


VAEGA MUAMUA



'O ONA PŌ O LE VAVAU

'E faigatā tele ona iloatino le tupu'aga, ma tau mulimuli tonu ai 'i faigāmalaga a tagata 'i ni seneturi e tele 'ua mavae. 'E leai ni tusi sā tūsia 'i nā onapō anamuā lava e ta'ita'ia ai a tātou sā'ili'iliga; 'o lea e tatau ai 'ona tātou fa'aaogāina ni uiga pei o fōliga tutusa i gagana, igoa o vāega o le lalolagi, āmioga fa'aleatunu'u, itū'āiga o gālua, tala'aga ma tala fa'afāgogo, ma fōliga o tagata 'i itū'āigā lanu 'ese'ese.

'Ua tātou iloa ai, 'o tagata Sāmoa, Toga, Maori, Tahiti, Hawai'i ma isi tagata o le Pāsefika tūtotonu, 'e 'auai 'i se 'āiga e tasi e ta'ua o le lanu Polenisia ('O le uiga o le 'upu Polenisia, 'o "motu e tele"). 'E tele nau-nau 'upu o gagana a nei tagata Polenisia e tūtusa pē tū tūtusa fo'i; tele igoa fa'atala o le lalolagi e fōliga tūtusa; tele aganu'u ma itū'āigā gālua e ta'atele 'i ā 'ilātou; 'e tūtusa fo'i ā lātou tala (pei lā, i se fa'ata'ita'iga, 'o tala 'e uiga 'i ā Maui, Tigilau, Lata, ma isi fo'i); 'o ō lātou fōliga fo'i e tū tūtusa, ma 'o 'ilātou 'uma e tā'ua Tagaloa 'o lō lātou atua faitele mo le puipuigā ma le ta'ita'iga.

Peita'i, 'ā fai lātou te va'ai atu 'i ā Melanesia (motu uuli), pei 'o Fiti, Niu 'Eperiti, Atu Solomona, Peretānia Fou, ma isi, e tū 'ese'ese 'uma lava nā mea; ma, e tusa ai lā 'ua tātou talitonu 'o tua'ā o tagata Sāmoa ma isi tagata Polenisia, 'e le'i ōmai 'i nā nofoaga pe na ui mai ai fo'i; ma e lē felāta'i 'ilātou ma le atu Melanesia.